

sum corpus, vel quædam, aut vna duntaxat pars laboret, quid primario, quid secundo, quid proprio, A
 stabilique affectu ægrotet; quid verò leuius in corpore afficiatur, quive morbi sit ueluti focus; Illud-
 que expendet, an in parte principe, & nobili, vel saltem publicum munus in corpore obeunte, uel po-
 tius in his, quæ reguntur ab alijs, nullamque dignitatem obtinent, vel etiam sibi soli seruiunt; an in
 externis, vel internis, superioribus, uel inferioribus partibus, ubi denique morbus consistat. Ac ut
 maneamus in exemplo de febre, age quæramus locum, ubi humores putrescant in febribus intermit-
 tentibus, an scilicet in habitu corporis, ut vulgus medicorum putat; an potius in venis ipsis (ut nos
 credimus) uel etiam in corde, ut ratio docet. Nam si aliter fieret, urina non posset febrium intermit-
 tentium tempora docere; si quidem ea, Galeno auctore libro quarto de Sanitate tuenda, index est co-
 ctionis, & cruditatis humorum, qui in uasis, nequaquam uerò eorum, qui in habitu corporis conti-
 nentur: scribitque in libro de Differentijs febrium sedimentum urinarum esse tanquam cinerem hu-
 moris ex putredine, & coctione, quæ in uenis fit, derelictum. **Temerè** preterea in his febribus adhibe-
 remus remedia, quæ ad obstructions internas faciunt; nec opus esset uenam secare, aut locus illis da-
 retur commodior, quando satis esset externos meatus aperire; ex quorum densitate, & constrictio-
 ne calor in habitu augetur, & putredo fieret. **Ad** hæc quomodo fieret uomitus incipiente accessio-
 ne, aut accessionem ipsam, uniuersamque febrem non solum uomitus, sed alui fluxus, & urinæ
 copia finirent; quippe quum nequeat alius humor per eas partes euacuari, quàm qui in partibus in-
 ternis, aut in uasis continetur. Nonne & illud quoque accideret aut omnes, aut certè biliosas fe-
 bres intermittentes, soluta prima accessione, nequaquam redire posse? Si enim ex humore conten-
 to, putrescenteque in habitu corporis febris nascitur, illeque excutitur præsertim in tertianis in prima
 accessione, adeo ut nihil relinquatur, quod purum interuallum ostendit quænam relinquitur benè af-
 fectis internis partibus, nouæ accessionis causa, id quoque alia ratione confirmatur, quod id nequeat
 esse omnibus intermittentibus febribus commune. Nam ut bilis, ob tenuitatem facilè per uniuersum
 corporis habitum spargitur, sic certè pituita, & melancholia ut pote crassi, & uiscidi humores, nequeunt
 spargi per exigua ea spacia, carnemque ipsam, & illic putrescere, ut illi uolunt. **Quur** & lassitudo om-
 nes tertianas comitatur, quum ea, quæ uicerosa dicitur, ex humore bilioso per carnem sparso
 fieri putetur? quur tumores à pituita illic contenta in his, qui quotidiana laborant, perpetuò
 non nascuntur? Sunt & multa alia argumenta, & probationes contra hanc opinionem, ut in
 opere nostro de febribus aliquando ostendimus: Nec Galenus, aut alius antiquus author nostræ re-
 pugnat sententiæ. **Quòd** verò in febribus putridis nequaquam etiam pestilentibus putrescant humo-
 res in corde facile probare licet. Nam alioqui sequeretur nunquam posse accendi febrem putridam in-
 cipientem putredinis causa à corde. Demus enim oriri putridam ex ira, aut ab alia cordis perturbatione;
 quomodo quæso aliter potest fieri putrida hæc febris, quàm quòd putredo incipiat à corde. Nā quòd
 putrida fiat à vapore putrido ab humore putrescente eleuato, & ad cor perueniente, verum quidem est
 in his febribus putridis, quæ ex inflammationibus nascuntur: at in alijs, quæ ex obstructionibus pro-
 ueniunt, aut ex cordis affectibus oriuntur, alia excogitanda ratio est, quæ nullo modo constare potest
 nisi ponamus in humoribus corde contentis putredinem esse. **Præterea** quum humores sint in reli-
 quis corporis partibus, facilius autem quod calidus est alijs, putrescat: quur reliquarum partium humo-
 res inuadet putredo: eos uerò, qui in corde sunt, haudquaquam attinget? Deinde si febris est tantum
 modo, quum aliquid præter naturam est calefactum in corde, erit profectò putrida, cum aliquid erit
 in illo putrefactum. Quomodo enim (quæso) alioqui potest esse febris putrida nulla re putrescente
 in corde, in quo fons, & locus est febris? Nam ut solidas partes spiritus, & humores excalescere opor-
 tet, ut, hectica, diaria, vel synocha fiat, sic sanè oportet humores putrescere in illo, ut putrida
 nascatur. Sunt & aliæ à nobis adductæ in eo opere rationes, quas hoc loco superfluum est adferre:
 nec aliquid obstat nostræ huic opinioni. Non enim propterea necesse fore omnes putridas pestil-
 entes fieri; si putredo in corde ponitur, nimirum quòd non putredo humorum in hoc, vel illo lo-
 co pestilentem, aut alterius generis putridam, sed diuersa putredo faciat; quod & alibi ostendi-
 mus. Nunc verò satis sit obiter docuisse locum putredinis in febribus intermittentibus non esse in
 habitu corporis ponendum, sed in uasis ipsis, ubi uniuersi humores continentur. Habent tamen
 singulæ febres intermittentes suum focus, à quo scilicet materia suppeditatur apta ad febrium
 singularum generationem. Atque ex hoc patet uniuersum corpus per febres putridas affici, ma-
 ximè tamen, & præcipuè cor, internaue uasa, & febrium singularum focos; reliquas uerò par-
 tes leuius laborare, nec primario, sed secundo lædi atque etiam in ipso corde per huiusmodi
 febres humores maximè, & primò pati; solidas uerò partes minus, & per consensum. Quod exem-
 plum regula esse poterit ad ea explicanda, quæ in singulis de loco affecto superius adnotanda esse di-
 ximus. Quæ quidem ad prædicendum euentum mali, & ad remedia idonea excogitanda viam pa-
 rant, & medicum instruunt.

De

*Putredo intermittens hum
 or intra uenas non uero
 extra*

*confutatur
 hoc
 à Galeno
 in 4to libro
 de diff.*